



Sesida dals

15 d'avust 2023

Communitgà ils

16 d'avust 2023

Protocol nr.

627/2023

Dumonda Favre Accola

concernent la surpigliada da la legislaziun da la UE davart las dronas – restricziuns per il Grischun sco lieu da perscrutaziun

Resposta da la Regenza

Tenor la Lescha federala davart l'aviatica (Lescha d'aviatica, LA; CS 748.0) surveglia il Cussegl federal l'aviatica en l'entira Svizra. Il Cussegl federal è er cumpetent per concluder cunvegns internaziunalas davart il traffic aviatic transcunfinal u davart la segirezza tecnica en l'aviatica. En il rom da la Cunvegna bilaterala davart il traffic aviatic reglan la Svizra e l'Uniun europeica (UE) il sector da l'aviatica internaziunala en moda unitara e sur in comité maschadà. Cun il consentiment dal Cussegl federal ha quest comité concludì ils 24 da november 2022 da surpigliar las prescripziuns da la UE davart eromobils nunoccupads (dronas, aviuns da model ed eromobils nunoccupads d'autras categorias). Las novas prescripziuns cuntegnan tranter auter standards da segirezza per la producziun, per l'admissiun e per il manaschi da dronas. Latiers tutgan autezzas maximalas da sgol, limitas da pais, restricziuns territorialas sco er prescripziuns concernent la protecziun da l'ambient, la protecziun da la sfera privata e la segirezza. Ina da las novaziuns pli impurtantas per pilotas e pilots da dronas è la divisiun dals objects sgulants en las trais categorias «avert», «spezial» e «certifitgà» – tut tenor la ristga da manaschi. A partir da la categoria «spezial» dovri ina permissiun da l'Uffizi federal d'aviatica civila (UFAC).

Tar la dumonda 1: Grazia a la surpigliada da la regulaziun da dronas da la UE po l'industria da dronas svizra, ch'è orientada a l'export, acceder al martgà internaziunal. Ultra da quai pon permissiuns vegnir reconuschidas vicendaivlamain, quai ch'è util per l'attractivada da l'economia locala svizra cun ses blers start-ups. A medem temp portan las prescripziuns armonisadas cun la UE però er restricziuns per intgins secturs d'applicaziun e chaschunan lavur supplementara. Cun la participaziun dals chantuns ha il UFAC perquai infurmà gia ordavant las gruppas d'interess pertutgadas davart las novaziuns, quai en il rom da differents formats da scolaziun. Cun divers meds auxiliars e cun prestaziuns da cussegliaziun simplifitgescha ed accelerescha

il UFAC plinavant il process da dumonda. Ils pli differentes acturs dal sector da la geomatica e d'autras branschas han inoltrà ils mais passads dumondas per lur manaschi da dronas specific al UFAC. En in process iterativ han els lura survegnì permissiuns da manaschi generalas per in u schizunt per dus onns. Perquai na constatti betg, ch'i sto vegnir inoltrà a l'autorità federala ina dumonda da permissiun per mintga singula incumbensa da sgol. Tenor il UFAC è il WSL Institut per la perscrutaziun da la naiv e da las lavinas (SLF) a Tavau, che appartegna al sector da las scolas politecnicas federalas, s'infurmà il november 2022 davart il nov sistem da permissiun ed ha lura survegnì las infurmaziuns da l'uffizi federal. Dapi lura n'ha il SLF – tenor l'infurmaziun dal UFAC – betg pli contactà l'uffizi federal e n'ha er betg inoltrà ina dumonda per ina permissiun da manaschi. Perquai n'èsi betg cler, quant enavant ch'il SLF ha adattà ses manaschi da dronas a las novas disposiziuns.

Tar la dumonda 2: Er senza esser commembra da la UE ha la Svizra pudì sa participar activamain a las lavurs da plirs onns per ina regulaziun europeica cumplessiva da las dronas. Per la branscha svizra da dronas resultan numerus avantatgs tras il rom giuridic armonisà cun la UE. I sto dentant vegnir admess che l'augment da la segirezza giuridica – che resulta tras l'unificaziun dal dretg – chaschuna er lavurs supplementaras, ch'ils pajais participants ston acceptar. Ina dumonda posteriura da la Svizra per regulaziuns spezialas per ils «pajais da muntogna» na sa laschass strusch giustificgar suenter la cooperaziun da plirs onns en il comité maschadà, suenter avair cuntanschì in'armonisaziun dal dretg sco er en vista al basegn d'adattaziun minimal, sch'in tal basegn è in summa avant maun.

Tar la dumonda 3: A las petentas ed als petents dat il UFAC per regla già oz ina permissiun da manaschi duravla dad in fin dus onns. Perquai na vesa la Regenza nagin basegn d'intervenziun. Als instituts da perscrutaziun vegni recumandà da tschertgar il barat cun il UFAC e d'instradar ensemen cun il post spezialisà dal UFAC – sco quai che er autras petentas ed auters petents han fatg – il process d'approvaziun concret per ina permissiun da manaschi dad in fin dus onns.



En num da la Regenza

Il president:

Peter Peyer

Il cancellier:

Daniel Spadin